

# PAGTULON-AN 1 - ANG UNANG MGA MAGPAPANAW

## Genesis 1-3

**TEMA:** Pagpaila sa labing mahinungdanong ideya niining hinan-ay nga mga pagtulon-an;  
**Pagpahayag nga si Cristo lamang ang makahatag pagtabon sa sala.**

Karon magasugod na kita sa pagpanaw. Kinahanglan atong hunahunaon nga nagapanaw kita sa dalan nga gitawag nato *ANG DALAN SA KINABUHI*. Kini nga dalan nagsugod didto sa tanaman sa Eden, diin ang kinabuhi sa tawo nagsugod. Ug kini matapus sa gingharian sa Dios dinhi sa kalibutan.

Kadtong magapanaw nagakinahanglan ug mapa o giya. Ang Dios naghatag kanato sa Iyang pulong-ang Bibliya; alang sa maong katuyoan, Salmo 119:105. Kita nagkinahanglan sa giya sa Dios ug ato kining gamiton samtang magalakaw kita sa dalan. Makahimamat kita ug daghang mga nagapanaw sa magalakaw kita sa *DALAN SA KINABUHI*. Makakita kita ug daghang mga nagapanaw nga nagalakaw sa ilang kaugalingong dalan, ang tanan nagalakaw nga nanagkuyog hangtud muabut ang paghukom. Ang Bibliya nagtug-an: “Adunay dalan nga daw matarung alang sa tawo, apan ang katapusan niana mao ang dalan sa kamatayon”, Proverbio 14:12. Ang tanang nagalakaw niining maong dalan mopili unsa nga dalan ilang gustong subayon.


Kadtong tanan nga magapanaw kinahanglan mahibalo sa mga lagda sa dalan. Atong makaplagaan nga ang mga balaod sa Dios sa pagpanaw nagkalahi sa matag panahon ug matag dapit. Niining panahon karon diin kita nagakinabuhi, ang mga balaod lahi ra kaayo sa mga balaod sa mga adlaw ni Adan ug Eba, ang unang mga tawo. Ang pagsunod sa mga balaod sa pagpanaw sa *DALAN SA KINABUHI*, nagakahulogan sa kinabuhi ug kamatayon.

Ang panahon diin kita nagakinabuhi gipasundayag sa mapa ingon nga TUGPAHANAN SA GRASYA. Imong mahibaloan unya ngano nga gitawag kini nga TUGPAHANAN SA GRASYA sa magapadayon kita sa atong pagpanaw.

Karon, atong ibalik ang panahon mga unom ka libo (6000) katuig ang milabay sa pagsugod nato sa atong pagpanaw didto sa matahum nga tanaman sa Eden. Dinhi atong makita sila si Adan ug si Eba. Kon atong tan-awon ang atong giya nga basahon, ang Bibliya, atong mabasa ang kasaysayan kon unsa ang nahitabo sa unang nagapanaw sa *DALAN SA KINABUHI*.

Ngadto kang Adan ug Eba gihatag ang mga pinasahi nga mga balaod sa pagpanaw. Ato kining mabasa sa Genesis 2:16-17. Sa tin-aw, sila gisugo sa Dios sa dili pagkaon sa bunga sa usa sa kahoy diha sa tanaman nga gihinganlan ug *kahoy sa pag-ila sa maayo ug sa*

*dautan*. Ang tanan didto sa tanaman hingpit hangtud mitungha ang maninintal, ang kaaway sa Dios ug sa tawo, nakigsultihanay kang Eba. Ang maninintal namakak ug si Eba mitoo sa maninintal kaysa sa Dios. Si Eba mitutok, mikuha ug mikaon sa bunga sa ginadili nga kahoy, ug iya usab gihatagan si Adan ug mikaon usab. Unya nabuka ang ilang mga mata sa pagkasad-an, diin sila kaniadto mga inosente. Karon ila nang nahibaloan nga sila mga sad-an ug hubo sa atubangan sa Dios ug sila mitago tungod sa kahadlok. Gipili ni Adan ug ni Eba ang dalan sa kamatayon. “Ang suhol sa sala mao ang kamatayon...”, Roma 6:23.



Tinubdan: Sweet Publishing – kini ilustrasyon lamang sa tanaman sa Eden

Ang kamatayon nagakahulogan *ug pagpakigbulag sa Dios* ug sa tawo, dili lamang niining kinabuhia kondili bisan pa sa eternidad. Si Adan ug si Eba misulay pagtabon sa ilang sala ug pagkahubo pinaagi sa ilang pagbuhat; nagtahi sila ug mga dahon sa kahoy nga igira aron mahimong tapis.

Unya, sa ilang pagpaningkamot sa pagtago gikan sa Dios didto sa kakahoyan, ang Dios miadto aron sa pagpangita kanila. Nangita ang Dios kanila kay sila gihigugma sa Dios, ug aron sa paghatag ug hukom sa ilang sala. Ang Dios mihatag sa tunglo sa bitin, sa babaye, sa lalaki

ug sa yuta. Unsa man ang mga tunglo? Ang Genesis 3:14-19, nagatug-an kanato sa hukom nga gihatag sa Dios sa matag usa kanila. Ang Dios nagtunglo sa yuta *tungod kang Adan*.

Uban sa mga tunglo, ang Dios sa grasya, sa gugma ug sa kaluoy naghatag usab ug saad sa usa ka Manunubos aron magbuntog sa sala ug kamatayon sa umaabut nga panahon; ug pagsamad sa ulo sa bitin, Genesis 3:15. Sa 1 Corinto 15:45, kini nga Manunubos gitawag nga *katapusang Adan*. Siya mao si Ginoong Jesu-Cristo, kinsa pinaagi sa Iyang kamatayon sa krus sa Kalbaryo, mibuntog sa sala ug kamatayon. Ug sa ingon, Iya usab gipildi ang yawa.

Ang Dios nagpatay ug hayop didto sa tanaman, ug ang dugo niini giula. Ang inosenteng hayop namatay ug ang panit gihatag kang Adan ug Eba aron sa pagtabon sa ilang pagkahubo. Ang Dios lamang ang makahatag sa maong tabon, ang tabon sa ilang sala. Kini hulagway sa Ginoong Jesu-Cristo, kinsa wala lamang nagtabon sa sala; apan Iya kining gikuha sa dalan pinaagi sa Iyang kamatayon ibabaw sa krus.

Ang kasaysayan sa unang mga magpapanaw maoy kasaysayan sa unang mga makasasala. Ang unang Adan nakasala, ug ang tanang natawo gikan kang Adan nga mianhi sa kalibutan natawo nga makasasala ug nanaghimog sala. Misunod sila sa ilang lider, Roma 5:12-14. Ang bayad sa sala mao ang kamatayon, busa ang tanan nagapadulong sa kamatayon; tanan nga nangabuhi niining dispensasyon sa Grasya ug usab sa ubang mga dispensasyon. Timan-i nga ang dispensasyon dili usa ka kapanahonan, apan mao ang pagdumala sa Dios. “Ang walay bayad nga gasa sa Dios mao ang kinabuhing dayon diha kang Cristo-Jesus atong Ginoo.” Ang buhat ni Adan ug ni Eba wala dawata sa Dios maingon man ang mga buhat sa mga tawo karon dili madawat sa Dios. Ingon nga ang panit sa hayop nga gihimong tapis sa lawas ni Adan ug Eba; mao man usab si Cristo mihatag sa gikinahanglan nga tabon sa pagkamatarung ngadto sa tanang mosalig Kaniya, ingon nga ilang kaugalingong Manluluwas.

Unsa ang imong gipili? Naa ka ba sa dalan nga *daw matarung* apan mao ang dalan sa kamatayon? O mosalig ka ba kang Ginoong Jesu-Cristo ingon nga imong kaugalingong Manluluwas gikan sa walay pagkatapus nga kamatayon ug modala kanimo sa dalan ngadto sa kinabuhing dayon?

**SAG-ULOHON NGA BERSIKULO: “Kay ang suhol sa sala mao ang kamatayon, apan ang walay bayad nga gasa sa Dios mao ang kinabuhing dayon diha kang Cristo-Jesus nga atong Ginoo.” Roma 6:23**

## PAGTULON-AN 1 – BULOHATON

Direksyon: Isulat ang hustong tubag sa mga pamahayag o pangutana.

1. Diin man nagsugod ang DALAN SA KINABUHI dinhi sa kalibutan? Genesis 2:8  
\_\_\_\_\_.
2. Asa man matapus ang DALAN SA KINABUHI dinhi sa kalibutan? Pinadayag 21:1  
\_\_\_\_\_.
3. Isulat ang Proverbio 14:12 \_\_\_\_\_  
\_\_\_\_\_.
4. Unsa man ang mga sugo sa pagpanaw didto sa tanaman sa Eden? Gen. 2:15-17
  - a) \_\_\_\_\_;
  - b) \_\_\_\_\_;
  - c) \_\_\_\_\_.
5. Unsa man ang silot nga gipahamtang sa bitin? Genesis 3:14-15  
\_\_\_\_\_  
\_\_\_\_\_.
6. Unsa man ang silot kang Eba? Genesis 3:16 \_\_\_\_\_  
\_\_\_\_\_.
7. Unsa man ang silot kang Adan? Genesis 3:17-19 \_\_\_\_\_  
\_\_\_\_\_.
8. Isulat ang unang panagna mahitungod ni Ginoong Jesu-Cristo: Genesis 3:15  
\_\_\_\_\_.
9. Kita pareha ra gayud kang Adan ug Eba diha sa tulo (3) ka paagi.
  - a) Roma 3:23 – Kitang tanan adunay sala \_\_\_\_\_;
  - b) Roma 5:12 – Kitang tanan paingon sa \_\_\_\_\_;
  - c) Roma 6:23 – Kita mahimong makaangkon sa \_\_\_\_\_  
\_\_\_\_\_ diha kang Jesu-Cristo nga atong Ginoo.
10. Isulat ang Roma 6:23 \_\_\_\_\_  
\_\_\_\_\_.